

2 PEDRO

Pedroa onte'ti o'manigmadoya'uyate.

Huaknopoe'eritaj Pedroa o'manigmadoya'uyate.

1 ¹Do Simón Pedro ijje'po on'nigmadoya'ne, huadi'da huaknopoe'eri huama'buy. Jesucristoen huanigpeika'eri ijje'y. Jesucristoen kamanbatia'pakike'po Diosa me'ta'mona'uyne. Opud konigti oro' Diostaj kenpa'ti Jesucristotaj moknopoe'ne. Dios kenpa'da huadakda o'epo Jesucristotaj oknopoenok oro'en dakhuea' e'ka' bokkahuea'po mo'nopo'yarea'ne. Huadakda mo'ene mona'ne. ²Diostaj Jesús Huairitaere nogiti nogiti moknopoenok Diosa nogiti mo'tinepahui'po 'urunopo'da mo'manopo'toike' kenpa'ti daka' mo'manoeye'. Kenda on'nigtiona'pakika'ne.

Jesucristotaj huaknopoe'eri nogiti nogiti 'urua'nanada nopoika'dik mo'e.

³Teynanada o'e Dios. Teyda o'epo 'urua'nanada e'ka'taj bo'tihuapokika'ne. Kenpa'ti daka' kan'nigpeike'po bo'tihuapokika'ne. Diostaj oknopoenok nogiti nogiti 'urunanada Diosen kika'dik o'ene. Kenpa'ti Dios 'urunanada o'epo huadaknanada o'kika'po oro'taj mo'baktie'ea'uyne konig ke'nensi'po

huae' mo'baktie'ea'uyne. ⁴Dios o'pakpo kenpa'ti teynanada o'epo, "Katetapi' bo'eretpakika'uy kan'batike'po on'tihuapokapone. Dakhuea' bo'kika'uy kan'batike'po on'tihuapokapone. Kenpa'ti konig Diosen 'urunopo' kan'nopo'toike'po on'tihuapokapone." Diosa o'pakpo mona'uyne. ⁵Konigepo Diostaj mo'noknopoe'po huakka' mo'deretpakpo 'urua'nanada mogkika'. Kenpa'ti Diosen nogiti nogiti mon'nopeika'. ⁶Kenpa'ti katetapi' e'eretpakpi' keje' a'dik mo'nepo nogiti nogiti huadakyo'da ijka'apoy mon'nope'po huadak mogkika'. Dakhuea' kahue' mo'ne. Kenpa'ti pai'da e'nopo'enayo diayahue'ada Diostaj daka' mo'noknopounhuahua'po batikhue' mo'ne. Kenpa'ti Diosda e'epa'tij huakka' mon'pakpo kenpa'da Dioseno'da mon'pakpo mogkika'. ⁷Dioseno'da yag'kika'po konig huama'buytaj di' ee'pa' aya'tada di' mon'mae. Oknopoe'hue' huae'eritakon di' mon'mae.

⁸Kenda konig nogiti nogiti e'kika'nayo nama'da kikahue' o'epone kenpa'ti nogiti nogiti 'uruda Jesucristo Huairitaj oknopoe'apone. ⁹Ken konig kikahue' ee'nayo konig ikpobig konig ikpohuiok o'ene. Diosa oro'en dakhuea' e'ka' bokkahuea'uyne ida okkahuedene. ¹⁰Diosa konig huasi'po

a'matoeya'po mo'baktie'ea'uynok
nogiti nogiti Diosen mogkika'po
nogiti nogiti mo'noknopoika'po
mo'noknopopepo batikhue' mo'epo.
11 Diosen 'urunanada o'kika'nok
Jesucristo Huairi o'pakpo
durugteda kurudyo bo'tohua'apone.
Jesucristo huamanopo'yarea'eria
mo'noeahuahuika'apone. Diosensi'po
o'noeonhuahuika'apo.

12 Kenda o'nona'dene mo'nopodedet
kenpa'ti buttida hua'a daka'
moknopojika'det okkahuehue'
ka'ne'po onte'ti on'manopoea'ika'ne.
13,14 A'ti ijbueyapoy Jesucristo Huairia
menopoea'dene. Do bueyhued ijjepe
ona'ti on'manopoea'ne. 'Urunopo'da
daka' yan'nigpeika'. Diostaj 'urunanada
yanigpeika'. Ona'ti on'manopoea'ne.
15 In on'nigmadoya'nig do e'bueyde'te
yan'nopounhuahuika'apet.

**Cristotaj Pedro nogomeyere
on'tiahuay'uyate. 'Urua'nanada
senogda o'uyate.**

16 Jesucristo huaboro' huairi o'epo
teynanada o'e. 'Urunanada o'epo
o'tiakapo. 'Urunanada kenpa'ti senogda
o'tiahuay'uy. Da onahue' o'nene.
Ijtiahuay'uyyo buttida o'nona'ne.
17,18 Ken Jesúsere ote'te o'epo, nog
huanigpeika'eri doere o'epo, konig
Dios o'ika' eynanada keregnada
senognanada o'ea'nok Apag Diosa
o'eypaka'uy. Kenpa'ti "In do'hued
Huasi'po huadi'da me'taene. Kentaj
ijtudurugpaki." Kurudya' hua'ayo'da
o'pee'uy. Jeyya'da Diosya' o'pee'uy.

19 A'nennada Diosen
huamanbatia'pakeria Cristotaj
on'timadoya'uyate. Apagba'te
daka' on'timadoya'uyate. Apagba'
mon'toepo buttida o'e mon'nopepo
nigpeedik mo'ne. Huakjey o'bakpakpo
jeyda o'enok 'uruda tiahuaydik
o'ene. Konigti Apagba' o'tiahuaypo

Jesucristotaj moknopoea'ne. Kenpa'ti
Jesucristo e'tiakte mo'nopo'toepo
'urunanada moknopoeapo. Konig
jeyda siokpo huanopo'taj e'ta'te
huadaknada moknopoeapo.
20,21 Diosen huamanbatia'pakeria
Apagba' on'manigmadoya'uyate.
Cristotaj buttida on'timadoya'uyate.
Hua'enda on'nopepo madoyahue'ada
Diosen Nokirega o'manopo'toepo
o'manopoeanok Diosen
hua'a on'batia'pakpo kenpa'ti
on'manigmadoya'uyate. Kenda daka'
yan'nopeoti', ijjay.

**Nama'da huamanmadika'eritaj
konig o'ne e'tia'pak.
(Judas 4-13)**

2 1 A'nennada Israel
aratbuttaj Diosen hueretda
huamanbatia'pakeria 'uruda
on'mana'ika'uyate. Buttida
on'manmadikika'uyate. Kenpa'ti
nama'da huamanbatia'pakeria
nama'da on'manmadika'uyate. Oy
konigti opudomeyere nama'da
huamanmadika'eri o'neapo.
"Diostaj buttida o'manmadikay,"
on'batia'pakpo da on'manmadika'apo.
Kenomeytaj Cristo hueypa cruzte
o'manigbuey'uynig'a "Jesucristotaj
oknopoehue'dik mo'e." Nama'da
on'batia'pakaponok Diosa ida castiga
o'magka'apo. 2 O'deretpakpo dakhuea'da
ogkika'apo. Nama'da on'manmadika'po
nama'da ogkika'apo. Huakka'
huaknopoe'eria on'peedepo konigti
dakhuea'da ogkika'apo. Jesucristoen
buttida hua'ataj on'tierikapo.
3 Opuden huakupe on'pakpo nama'da
mo'manmadika'apone. "Huakupe
beyok," mona'apo. A'nenda "Dakhuea'
huaka'eritaj kenpa'ti nama'da
huamanmadika'eritaj castiga diga'
ijmagka'apoy." Diosa oa'uyate. A'ti
castiga o'magka'apo.

⁴A'nennada sue'da Diosen huata'moneri kurudyō Diosere o'nepo Diostaj nigpeehue'da o'nepo dakhuea'da ogka'uyate. Diosa matinepahuihue'da castiga o'magka'po sikkiregyo pai'da kan'nopo'unhuahuike'po o'maen'uyate. Diosen castiga diga' egka'te sikkiregyo on'maunhuahua'. ⁵Kenpa'ti a'nennada e'pogtone' tiakhued Noéere huakka'nanada aratbut o'nuyate. Aratbut dakhuea'nanada ogkika'uyate. "Yan'nopo'korea', yan'nopo'korea', Diostaj yan'nigpeika', onte'ti huadak yag'kika'." Noéa o'mananhuahuika'uyng'a pēehue' o'nika'uyatenok Diosa matinepahuihue' o'epo e'pogtone' o'ta'mona'uyate. Aya'da on'bata'kot'uyate. Noétaj sietetakon kusi'petone'yo Diosa o'batioka'nok ta'kothue' o'nuyate. ⁶Kenpa'ti a'ennanada Sodoma huakka' jak huae'eri kenpa'ti Gomorra huakka' jakyo huae'eri o'nepo dakhuea'da ogkika'po nopo'koreahue' o'nenok Diosa castiga o'magka'po aya'tada jakbeta' o'bakpaka'uyate. Aya'da on'mabuey'uyate. Parokupoyo'da o'uyate. Diosa aya' dakhuea' huaka'eritaj diga' castiga o'magka'apo a'manopoeaya'po Sodoma Gomorraeretaj o'bakpaka'uyate. ^{7,8}Lotnayo huadaka'da o'uyate. Sodomayo o'ika'uyate. Jaktaj Diosa bakpakahued aratbut dakhuea'da ogkika'uyate. Aratbut dakhuea'nanada ogkika'nok Lot kenda o'batiahuayika'po suhue'da o'makepo kenpa'ti pai'da o'maknopo'unhuahua'uyate. Ken Sodoma jaktaj Diosa bakpakahued ee'te Lottaj o'toepo o'torokuyate. ⁹Ken oro'takon Diosa dakhuea' e'ka' nopo'tiokika'dik mo'ene. Diosenyo'da e'kika'ta' e'paknayo toto' engaña e'nika'tada Diosa bo'tiokika'apone. Dakhuea' huaka'eritanayo pai'da

on'nopo'unhuahua'po Diosa o'matounhuahuika'po nogok kene'huaya' huame'noete "Dakhuea' boka'uy." Diosa o'mana'apo. Castiga o'magka'apo.

¹⁰Kenomey nama'da huamanmadika'eri hua'enda o'deretpakpo Diostaj me'pukhue' o'nepo Jesús Huairitaj e'nigpeeta' pakhue' o'nepo Diosen 'urunanada huairitaj dakhuea' on'bahuaa'po. Me'pukhue'da kenpa'ti huiyoka on'bahuaa'po. Diosa castiga o'magka'apo. ¹¹Diosen huata'monerinayo teynanada ee'pi' ighua'da manahue'dik o'nepo Diosen 'urunanada huairi "dakhuea' ogka'," huaahue' o'ne Diostaj.

¹²Inomey nama'da huamanmadika'eri nopoehue'ada dakhuea' on'da'ika'. Diosa castiga o'magka'apo. On'mabueyapo. Konig 'uhuanig o'nepo. 'Uhuanayo nopoehue'ada o'pakpo o'ka'. Huape' on'batiaraka'ika'. ¹³Nama'da huamanmadika'eri dakhuea' ogkika'nok pai'nanada on'nopo'eapo. Kenpa'da e'durugpakta' on'deretpakika'. "Hueretda huaknopoe'eri o'ey." Nama'da on'batia'pakpo opudere ogkupopakpo on'batadi'kea'po durugteda on'batobape'po. Engaña ijmagkay on'nopoepo durugda o'ne. Nama'da huamanmadika'eritaj bakbira'dik mo'ene.

¹⁴Nama'da huamanmadika'eri ettone' on'tiahuaypo diga' o'deretpakika'po dakhuea' ogka'po sue'da huaknopoe'eritaj, "Durugteda dakhuea' mogka'." Nama'da on'manika'po kenpa'ti huakka'da katepi' e'tamaeta' o'deretpakika'. "Dakhue'da o'ne," Diosa oa'de. ¹⁵Kenpa'ti inomey huamanmadika'eri buttida hua'ataj on'batikdepo konig Diosya' ekyoyahue' nama'da ogkika'po. Konig Balaam

o'ka'uyate inomey ogkika'. A'nennada Balaam Diosen huamanbatia'pakeri o'epo Beorensi'po o'uyate. Huakka' huakupeta' o'eretpakpo Diostaj nigpeehue'da o'epo dakhuea'da o'ka'uyate. ¹⁶Diostaj nigpeehue'ada e'hua'te Balaamen burra 'uhua'a aratbuten hua'a ona'po "Huakupeta' i'pakpo Diostaj nigpeehue'ada dakhuea' i'ka'ne. Kenda kahue' yae'." Burra 'uhua'a ona'nok o'kore'uyate.

¹⁷Konig hue'ey okposagyō ehue' ee'yo nama'da huamanmadika'eri konig o'ne. Hue'ey okposagyō ehue' ee'yo bohua'nig'a ehue' o'e. Nama'da huamanmadika'eriyo bohua'nig'a daka' manmadikahue' o'ne. Kenpa'ti konig e'sihui' huihued bapoka o'tohua' konigti kenomey o'ne. E'hui'ta' bo'paknig'a huihue' o'e. 'Uruda e'manmadika' e'peeta' bo'paknig'a peehue' mo'e. Nama'da on'manmadika'nok Diosa castiga o'magka'apo. Sikkiregyonanada on'noeonhuahuika'apo. ¹⁸"Dakhuea' e'ka'tada. Katepi' o'pakpo e'kika'tada. Diosa castiga ogkahue' mo'ika'ne." Da on'mana'po, "Yan'tiak, oro'ere dakhuea' mogka'." Nama'da on'mana'po huabokerek huaboa'da e'noknopode'te huaboa'da Diosta e'nigpeede' kenomeytaj nama'da on'mana'po. ¹⁹"Katepi' bo'pakpo kika'dik mo'ene." Huaboa'da huaknopoe'eritaj nama'da e'mana'tada nama'da huamanmadika'eria huadak kikahue'dik o'nepo dakhuea' ogkika'. Konig toto'en huanaba' o'nepo dakhuea' ogkika'po batikhue'dik o'ne. ²⁰Sue'da aratbut dakhuea' ogka'depo huaboa'da Jesucristo Huairitaj o'noknopode'epo, Jesucristo huamanopo'yarea'eritaj on'nopo'korea'depo onte'ti Diosenyo'da ogkika'depo nogok ona'ti dakhuea' egkika'nayo kenomeytaj ke'poda e'dik o'neapo. Dakhue'nanada

e'dik o'neapo. ²¹Oknopohue' huae'eria sue'da dakhue'mon e'eda Diosen huadak hua'a on'peede'epo o'noknopode'epo nogok eknopode'ada e'batiknayo onte'ti dakhuea' eka'nayo dakhue'nanada o'ne. ²²Eknopode'te onte'ti dakhuea' egkika'nayo konig kuhua o'ne kenpa'ti konig huakyari' o'ne. "Kuhua hua'enda e'okpi' onte'ti on'minika'. Huakyari' huaboa'da e'oo'deada onte'ti samibiyo o'huedika'." Kenda aratbut buttida oa'ika'.

Jesucristo Huairi onte'ti o'tiakapo.

3 ¹A'nenda on'nigmadoya'uyne. Onte'ti on'nigmadoya'ne, huadi'. Onte'ti e'manopoea'ta' on'tipakne. Onte'ti e'maboroay'ta' ijpaki. ²Diosen huamanbatia'pakeri on'mana'uyate. Kenda Diosa o'ka'apo kenpa'ti konig o'eapo on'manbatia'pakuyate. Onte'ti onte'ti on'nopeanhua'apone. Kenpa'ti Jesucristo oro'en huairi kenpa'ti oro'en dakhuea' e'ka' huamanopo'yarea'erien e'mana' Cristoen huata'mona'eria mona'uyne. Onte'ti onte'ti on'nopeanhua'apone.

³In ijbatia'pakaponig yan'nopoe'. Nogok Jesucristo tiakhued kene'huaya' huame'noete huakka' oknopohue' huae'eri o'neapo. Katepi' dakhue'da hua'enda on'pakpo ogkika'apo. Diostaj on'tierikapo. ⁴"Onte'ti ijtiakapoy." Jesúsa oa'uyatenig'a, menpa' nama'da oa'uyate. Ehue' tiakhue' o'eapo. A'nenda huadari e'ka'te oro'en adhuae'pane' on'mabuey'uyate oy kenpa'ti huadari konigti o'e. Oknopohue' huae'eria on'batia'pakaponig'a. ⁵A'nennada Diosa oa'uynok huaboa'da kurud siokpoere niokpokon puug nog o'uyate. Kenpa'ti hue'ey o'uyate. Diosa onte'ti oa'uynok hue'e'yya' huadari ote'ere o'oro'ka'uyate. Huadariere e'pog huahueere o'uyate. Kenda oknopohue'

huae'eria eknope'ta' pakhue' o'ne.
⁶Kenpa'ti a'nenda Noé e'noete
 aratbut dakhuea'da ogkika'uynok
 Diosa castiga a'magkaya'po
 e'pogtone' o'matitamonapo aya'da
 on'mabuey'uyate. ⁷"Kurud huadariere
 aya'da bo'tiahuayika'nig aya'da
 mahuigdik o'eapo." Diosa kenpa'ti
 oa'po oy ta'aka huamamey o'nigika'ne.
 Nogok "Dakhuea' boka'nok castiga
 ogka'dik o'nene." Diosa o'mana'depo
 castiga o'magka'apo kenpa'ti kurud
 huadariere o'mahuigapo.

⁸Kenpa'ti mil huabayok
 ijhue'nananada o'pokonhuahua'
 oro'nayo o'nopoey. Diosnayo konig
 oro' nopoehue' o'e. Mil huabayok
 ijhue'nanada o'unhuahua' nopoehue'
 o'epo idada o'pok o'nopoé Diosnayo.
 Mil huabayok ee'pi' nogme'noetida
 Diosanayo o'tonopoika', huadi'da
 egomey. ⁹Kenpa'ti "Ijtiakapoy."
 Jesús Huairia mona'uyne. Tiakhued
 o'epo ijhue'nada o'epo o'tiak sue'da
 huakka'a nama'da on'nope'ni'ga
 aratbuttaj o'matinepahui'po castiga
 e'magka'ta' pakhue' o'epo dakhuea'
 huaka'eritaj e'manopo'korea'ta'
 o'manigunhuahua'po castiga
 e'magka'ta' pakhue' o'epo aya'tada
 e'manopo'korea'ta' o'pak.

¹⁰Dapita' Jesús Huairi o'tiakapo.
 Kentaj ekpoe' ngehue' ee'te o'tiakapo.
 Kenoka' aratbut nopoehue' ee'te
 huabereeri on'tiak. Konigti Jesús
 o'tiakapo. E'tiakte kurud 'utta'nanada
 oa'nig ehue'da o'eapo. Aya'da
 o'mamey'apo. Huadaritaj kenpa'ti
 aya'da katepi' o'ika'nig o'mahuigapo.
 Ehue'nanada o'eapo.

¹¹Ken aya'da o'tiahuayika'nig
 o'mameydepo ehue'da o'eapo. Kenda
 mon'nope'po mon'nopo'korea'. Onte'ti
 dakhuea' kahue' mo'ne. Diosenyo'da
 mogkika'. 'Urua'nanada mogkika'.
 Diostayo'da mon'nigpeika'. ¹²Dios

tiakdik o'enok mon'nigunhuahua'ika'.
 Kenpa'ti Dios Huairi e'tiakte daka'
 mo'nonmabodhuahua'. Ida katiake'po
 daka' Diosen mogkika'. E'tiakte kurudyo
 aya' o'tiahuayika'nig o'mahuigapo.
 Ehue'da o'eapo. ¹³Huabo kurud huabo
 huadariere o'eapo. Diosa oa'uyatenok
 huabo kurud huabodaritakon
 o'nigunhuahuika'ne oro'omey.
 Huabokurudyo huabodariya' aya'da
 huadakda o'eapo. Aya'da huadak
 ogkika'apo.

¹⁴Jesucristo o'tiakaponok huabo
 kurud huabodari o'eaponok Jesucristo
 e'tiakte huadak mogkika' kenpa'ti
 huayahua' mo'manoeynoey'ika'.
 Kahuahuaye'po kenpa'ti opudomeytaj
 kamadurugpake'po bo'eretpakpo
 dig'a'da Diosen yag'kika'. 'Uruanada
 yag'kika', huadi'da huama'buy.
¹⁵Oro'omeytaj a'manopo'koreaya'po
 kenpa'ti Jesucristotaj
 kanoknope'po kenpa'ti nogomeytaj
 a'manopo'yareaya'po Jesús Huairia
 o'matinepahui'po mo'nigunhuahuika'ne
 yan'nope'. Konigti huadi'da
 huama'buy Pabloa mo'nigmadoya'uyate.
 Diosa Pablotaj o'nopo'e'nik nok Pabloa
 mo'nigmadoya'uyate. ¹⁶Jesucristo
 o'tiakdeapo kenpa'ti Diosen
 'uru'nanada yag'kika' Pabloa
 o'manigmadoya'ika'. Pabloen hua'a
 nogdik nogdik e'manigmadoya'
 dakuapa be'api' nopoekahue'dik
 o'ne. Nopoehue' huae'eri kenpa'ti
 e'nope'ta' pakhue' huae'eri nama'da
 nogpa'da Pabloen e'manigmadoya'
 on'manbatia'pakika'. Kenpa'ti
 Apagba'taj nama'da nogpa'da
 on'batia'paknok Diosa o'maenapo.

¹⁷Inomey Diostaj nigpeehue' huae'eri
 inomey nama'da huaa'eri inomey
 Diostaj nopoekahue'da huae'eri
 konig o'ne, on'nokota'ne, huadi'da
 egomey. Nama'da manmadikahued
 e'ne'ted opudomeytaj on'nope'a'ne.

Kenpa'ti moknopōepo okbatikhue'
 ya'ne on'nokota'ne. ¹⁸Jesucristo
 Huairi oro'en dakhuea' e'ka'
 huamanopo'yarea'eritaj nogiti nogiti
 yanoknopōē'. Kenpa'ti konig Jesús di'

mo'epo mo'nigbuey'uyate konigti nogiti
 nogiti di' yan'mae'ikati'. Jesucristo
 Huairi kenpa'da huadaknanada o'ika'
 mon'batia'pakika'. 'Urunanada o'e
 mon'batia'pakika'. Ken.